



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

“PEGANGAN AHLI SUNNAH WAL JAMA’AH: MENGUKUHKAN PERPADUAN UMMAH”

22 Julai 2022 / 22 Zulhijjah 1443

الْحَمْدُ لِلَّهِ¹ الْقَائِلِ:

﴿وَأَنْ هَذَا صِرَاطِي مُسْتَقِيمًا فَاتَّبِعُوهُ وَلَا تَتَّبِعُوا السُّبُلَ فَتَفَرَّقَ بِكُمْ عَنْ سَبِيلِهِ ذَٰلِكُمْ وَصَّيْتُكُمْ بِهِ لَعَلَّكُمْ تَتَّقُونَ ﴿١٥٣﴾﴾

Bermaksud: Dan bahawa sesungguhnya inilah jalan Ku (Agama Islam) yang betul lurus, maka hendaklah kamu menurutnya dan janganlah kamu menurut jalan-jalan (yang lain dari Islam) kerana jalan-jalan (yang lain itu) menceraikan kamu dari jalan Allah, dengan demikian itulah Allah perintahkan kamu supaya kamu bertakwa.

(Surah Al-An’am ayat 153)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ² وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ فَيَا عِبَادَ اللَّهِ! اتَّقُوا اللَّهَ³ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah,

Marilah kita tingkatkan ketakwaan ke hadrat Ilahi dengan melaksanakan segala perintah dan meninggalkan semua larangan Nya, mengikhlaskan setiap amal, semoga kita sentiasa mendapat taufik dan hidayah serta diperkukuhkan iman mengabdikan diri semata-mata kepada Allah Yang Maha Esa. Mimbar pada hari ini akan membicarakan khutbah bertajuk: “PEGANGAN AHLI SUNNAH WAL JAMA’AH: MENGUKUHKAN PERPADUAN UMMAH”

Perpaduan dan kesatuan ummah ialah perkara asas dalam Islam. Islam mencela perpecahan dan pertelingkahan. Firman Allah SWT:

¹ Memuji Allah

² Selawat ke atas Nabi Muhammad SAW

³ Pesan Taqwa



﴿وَأَطِيعُوا اللَّهَ وَرَسُولَهُ وَلَا تَنَازَعُوا فَتَفْشَلُوا وَتَذْهَبَ رِيحُكُمْ وَأَصْبِرُوا إِنَّ اللَّهَ مَعَ

الصَّابِرِينَ ﴿٤٦﴾

Bermaksud: Dan taatlah kamu kepada Allah dan Rasul Nya dan janganlah kamu berbantah bantahan. Jika tidak, nescaya kamu menjadi lemah semangat dan hilang kekuatan kamu, dan sabarlah (menghadapi segala kesukaran dengan cekal hati) sesungguhnya Allah beserta orang-orang yang sabar. (Surah Al-Anfal ayat 46)

Dari sudut aqidah dan aliran pemikiran, umat Islam telah berjaya membina perpaduan dengan berpegang kepada aqidah Ahli Sunnah Waljamaah. Ahli Sunnah Waljamaah bererti mereka yang berpegang kepada sunnah Rasulullah SAW dan para sahabat Ridwanullahi alaihim. Muzakarah Jawatankuasa Fatwa Kebangsaan Bagi Hal Ehwal Ugama Islam Malaysia yang bersidang pada 5 Mei 1996 telah memutuskan bahawa umat Islam di negara ini hendaklah mengikut ajaran Islam berpaksikan Ahli Sunnah Waljamaah daripada segi aqidah, syariah dan akhlak.

Alhamdulillah, berpaksikan pegangan Ahli Sunnah Waljamaah yang berpegangan mazhab Asyairah dan Maturidiyah dari sudut aqidah, mazhab Syafii dari sudut fiqah dan mazhab al-Junaid dan al-Ghazaliy dari sudut akhlak, umat Islam di Malaysia telah berjaya disatukan. Jasa Imam Syafii, Imam Asya’ari dan Imam Ghazaliy begitu bermakna kepada ummah. Mereka telah memudahkan ummah untuk memahami ilmu aqidah, fiqah dan akhlak. Sentuhan mereka telah diteruskan oleh para ulama Nusantara sehingga terzahir kesatuan pemikiran dalam kalangan umat Islam di rantau ini, berupaya menepis isu-isu khilafiah yang boleh membawa perpecahan ummah.

Sidang Jumaat Yang Dirahmati Allah,

Pegangan Ahli Sunnah Waljamaah dikenal pasti bersumberkan al-Quran dan As-Sunnah, teradun dan terbina daripada nas-nas dan dalil-dalil syarak yang sahih tanpa mengabaikan kebijaksanaan akal fikiran insani. Pegangan Ahli Sunnah Waljamaah juga terbukti sebagai dasar dan pegangan beragama yang berjaya menyatukan ummah, sekali gus membantu menyejahterakan kehidupan bernegara. Antara ciri-ciri utama Ahli Sunnah Waljamaah ialah:

Pertama, berpegang dan mentafsirkan hukum-hukum Islam berlandaskan sumber perundangan utama iaitu al-Quran, hadis, ijmak dan qiyas.



Kedua, berpegang kepada ajaran Islam yang meliputi perkara mengenai iman iaitu aqidah, Islam iaitu syarak, dan ihsan iaitu akhlak.

Ketiga, percaya bahawa kesemua para sahabat bersikap benar dan adil.

Keempat, percaya dan beriman kepada perkara ghaib melalui al-Quran dan hadis.

Kelima, tidak mengkufurkan sesama Muslim dengan begitu mudah kecuali atas pertimbangan ilmu atau hujah yang kukuh dan adil.

Keenam, sederhana dalam kepercayaan dan amalan, bersifat tidak terlalu melampau dan tidak juga terlalu meringankan.

Sidang Jumaat Yang Dirahmati Allah,

Aliran pemikiran yang bercanggah dengan Ahli Sunnah Waljamaah hendaklah dielakkan dan dijauhi. Duli Yang Maha Mulia Paduka Seri Sultan Perak Darul Ridzuan pernah menzahirkan peringatan:

“Penularan pelbagai aliran pemikiran lama dan baharu yang menongkah arus pegangan Ahli Sunnah Waljamaah merupakan satu cabaran yang bakal merungkai pegangan aqidah dan boleh memporak-perandakan ummah. Ulama dan cendekiawan Islam hendaklah mencari titik pertemuan dan kata sepakat menangani isu berkaitan daripada berlarutan. Dalam matlamat mahu mencari titik pertemuan, perbincangan yang dirintis, hendaklah lebih bijaksana dan dilakukan dalam semangat permuafakatan secara halus dan di belakang tabir, daripada digembar-gemburkan di khalayak ramai, disebabkan masing-masing mahu menegakkan kebenaran hingga mengakibatkan umat keliru”

Di samping itu, ummah juga tidak sepatutnya dihimpit dengan isu-isu khilafiah yang membebankan; sedangkan isu-isu tersebut telah berjaya dirungkaikan dengan bijaksana oleh ulama terdahulu. Jika perkara-perkara khilafiah terus berlarutan, dikhuatiri akan terjejas tumpuan umat Islam untuk menangani pelbagai isu yang lebih besar seperti kepimpinan, kenegaraan, keamanan, gejala sosial, rasuah, kemiskinan, pendidikan, pemantapan institusi keluarga, pemupukan nilai murni, memelihara alam sekitar dan lain-lain.

Sidang Jumaat Yang Dirahmati Allah,

Marilah kita bersama-sama berganding bahu membanteras ajaran dan fahaman yang menyalahi aqidah Ahli Sunnah Waljamaah dengan tidak mensia-siakan masa menyibukkan diri pada perkara-perkara yang boleh mendatangkan mudarat atau yang berkemungkinan mengakibatkan umat berselisih faham hingga menjejaskan perpaduan.



﴿ وَإِنْ تَطَعْتَ أَكْثَرُ مَنْ فِي الْأَرْضِ يُضِلُّوكَ عَنْ سَبِيلِ اللَّهِ إِنْ يَتَّبِعُونَ إِلَّا الظَّنَّ وَإِنْ هُمْ إِلَّا

يَخْرُصُونَ ﴿١١٦﴾

Bermaksud: Dan jika engkau menuruti kebanyakan orang yang ada di muka bumi, nescaya mereka akan menyesatkan engkau dari jalan Allah; tidaklah apa yang mereka ikuti itu melainkan sangkaan semata-mata, dan mereka itu tidak lain hanyalah berdu sta.

(Surah al-An’am ayat 116)

Mimbar menyeru Muslimin kepada peringatan-peringatan berikut:

Pertama: Pegangan Ahli Sunnah Waljamaah adalah satu-satunya aqidah dan pegangan yang diyakini serta dijamin selamat daripada azab api neraka oleh Rasulullah SAW

Kedua: Ummah wajib berganding bahu memastikan pegangan Ahli Sunnah Waljamaah terus dihayati dan diamalkan, dan sama-sama membanteras dengan melaporkan kepada pihak berkuasa mana-mana ajaran yang bertentangan dengannya.

Ketiga: Perkukuhkan ilmu agama dengan mempelajarinya dari agamawan yang berke Layakan serta memiliki tauliah mengajar daripada pihak berkuasa.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ
وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ
الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

Khutbah Kedua

الْحَمْدُ لِلَّهِ⁴ حَمْدًا يُؤَافِي نِعْمَهُ وَيُكَافِي مَزِيدَهُ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ
وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي
الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ⁸، وَأَصْلِحْ ذَاتَ بَيْنِهِمْ وَالْفِ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ
وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ. رَبَّنَا لَا تُرْغِ قُلُوبَنَا بَعْدَ إِذْ هَدَيْتَنَا وَهَبْ
لَنَا مِنْ لَدُنْكَ رَحْمَةً إِنَّكَ أَنْتَ الْوَهَّابُ.

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

⁷ Ayat Al-Quran

⁸ Doa untuk Kaum Muslimin



Ya Allah! Ya Rabbal 'alamin!, Janganlah Engkau palingkan hati kami setelah kami diberikan hidayah agama Islam. Tetapkanlah aqidah dan agama kami, akhiri hayat kami dalam keadaan Islam dan iman.

Ya Mannan! Ya Razzaq!, berkatilah hamba Mu yang melaksanakan tuntutan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

Ya Dzal Jalaali wal Ikram!, jadikanlah kami antara hamba Mu yang memelihara amanah. Kuatkan iman kami agar menjauhi perbuatan khianat seperti salah guna harta benda bukan milik kami, memberi atau menerima rasuah, menyalahgunakan kuasa untuk kepentingan diri, serta jauhkan kami termasuk dalam golongan yang mengabaikan tanggungjawab yang diamanahkan.

Ya Maalikal Mulk!, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Malik! Ya Hadi!, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ

فَيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ ﴿فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا لَهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِيكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ﴾.